

Alfons Beer, Surrein/Sedrun



La caplutta en casa da s.Vigeli ei stada il davos liug en veta digl Alfons. Ils 2 d'october 1996 vegn el tschaffaus leu d'ina attacca dil cor ella vegliadetgna dad 81 onn.

Igl Alfons Beer ei naschius ils 7 d'uost 1915 a Surrein/Foppas sco sisavel affon dils geniturs Vigeli Beer e Cristgina naschida Hendry. El ravugl d'ina famiglia cristiana ha el senza dubi passentau ina ventireivla affonza ella biala ucliva da Foppas. Suenter giu haver frequetau las scolas da vischnaunca vi Sedrun ha ei tucchau agl Alfons da serender egl jester per leu gudignar il paun da mintgadi e segidar cun la famiglia. Denter auter eis el staus entgins onns fumegl da purs el Cantun Zug. Turnaus anavos

ella patria fa el il pur ensemen cun ses frars e sia sora a Surrein entochen igl onn 1973. Quei onn bandunan ils fargliuns Beer l'ucliva Foppas e prendan dimora vi Sedrun. Ils emprems onns serendeva igl Alfons adina puspei a Surrein a far fein e cunzun a far ora lenna, quei che fuva empau siu plascher. Igl onn 1994 serenda el en casa da s.Vigeli per passentar leu la beinmeritada sera dalla veta.

Cugl Alfons ein els tuts serendi ella veta perpetna, ils Beers da Surrein sco els vegnevan pil pli numnai. Igl Alfons ei stau in original; sias ideas e ses meinis fuvan interessants siu daffar e trafficar magari empau nunusitau. El meretta ussa il ruaus perpeten.